

Headline	Kaji hutan Endau Rompin		
MediaTitle	Utusan Malaysia		
Date	10 Sep 2012	Color	Full Color
Section	Supplement	Circulation	197,952
Page No	21	Readership	833,287
Language	Malay	ArticleSize	379 cm ²
Journalist	N/A	AdValue	RM 7,559
Frequency	Daily	PR Value	RM 22,677



Kaji hutan Endau-Rompin

Merekod maklumat kajian berkaitan fauna dan flora di hutan berusia 248 juta tahun

SERAMAI 50 peserta yang sebahagiannya terdiri daripada penyelidik Universiti Tun Hussein Onn Malaysia (UTHM) meneroka hutan Taman Negara Endau-Rompin selama sembilan hari untuk menjalankan pelbagai kajian selain mencari dan merekod maklumat penting berkaitan hutan dan alam semulajadinya.

Ekspedisi Trans Selai-Peta merupakan program anjuran pihak Perbadanan Taman Negara Johor, UTHM dan juga Persatuan Pencinta Alam Malaysia. Penyelidik UTHM yang diketuai oleh Profesor Datin Dr. Maryati Mohamed memulakan ekspedisi sejauh 44 kilometer bermula dari Selai, Segamat menuju ke Peta, Mersing pada 30 Jun hingga 8 Julai lalu.

Ekspedisi itu dianggap antara penjelajahan paling mencabar pernah diadakan berikutan denai digunakan peserta tidak pernah digunakan sejak sepuluh tahun lalu.

Selain UTHM, ekspedisi tersebut turut membabitkan penyelidik dari Persatuan Pencinta Alam Malaysia (MNS), Universiti Putra Malaysia (UPM), Universiti Malaysia Kelantan (UMK), Institut Penyelidikan Perhutanan Malaysia (FRIM), Jabatan Perikanan, dan dibantu oleh Jabatan Pertahanan Awam Malaysia (JPAM), kakitangan Perbadanan Taman Negara Johor (PTNJ), Jabatan Perlindungan Hidupan Liar dan Taman Negara (PERHILITAN) dan masyarakat tempatan iaitu Orang Asli suku Orang Hulu.

Menyusuri denai yang juga laluan utama gajah dan berperang dengan serangan puluhan pacat antara cabaran utama yang dihadapi oleh peserta ekspedisi ini.

Perjalanan turut melalui air terjun, mendaki cerun yang curam, menuruni lembah dan meredah hujan namun semua itu tidak menghalang penyelidik melakukan tugas-tugas merekod, mengumpul dan mengkaji.

Dr. Maryati berkata, ekspedisi itu bertujuan mengumpul bahan kajian flora dan fauna serta melakukan beberapa kajian berkaitan air merangkumi hidrologi, kualiti dan petunjuk bio.

"Kajian ini memberi mengenai geologi, landskap, serangga, tumbuhan ubatan, etnoentomologi (serangga penting dalam

kehidupan), kepelbagaian orkid, kulat dan perikanan.

"Segala maklumat dan penemuan baru yang direkodkan semasa ekspedisi ini diharap dapat dijadikan panduan berguna dan membantu pihak-pihak tertentu untuk sebarang usaha memulihara hutan semulajadi di negara kita," katanya.

Sementara itu, satu sesi pembentangan hasil kajian peringkat awal yang diperolehi pengkaji UTHM juga telah diadakan di kampus induk UTHM baru-baru ini.

Dalam sesi pembentangan tersebut, Dr. Maryati berkata, kumpulan penyelidik UTHM akan meneruskan kajian masing-masing melalui sampel yang dikutip serta juga akan terus ke lapangan, bagi mengetahui biodiversiti di taman yang dianggarkan berusia 248 juta tahun ini.

Hadir sama mendengarkan pembentangan tersebut Naib Canselor UTHM, Profesor Datuk Dr. Mohd Noh Dalimin.



SEBAHAGIAN daripada penyelidik UTHM merentasi sebatang anak sungai bagi menjalankan kajian di hutan Endau-Rompin.